

善人開道如大江之淵大海之源惟受不逆道教難問聖人難值賢者難遇自非天地運度當交經道不出聖人不見帝王有道聖人生國大運當交期度將會天運轉促至末世之後朔旦冬節金氏之世經道方明其時當暫太平數十年中人民五分四分知道至金馬之末天運交周水龍之歲李君出治其時聖世生死善惡將分善心男女逆作善功至時當有聖人出世度人有遇值者便是宿功報應或身得超度或一門同慶得入福中當惡之人常與善乖聞聖人說法謂之為无此非善人之根天閉其心使不與聖人相宜故善惡異流天地永隔運交之際道德雖與愚者甚多知道者少萬中有一以為多也各各教化不尋本源其時當有鬼點之子因是猶豫二心不信大法亦不能分別真偽將是期度欲交天使之然有心男女善則勿退退則失爾前功一失賢人萬劫不會夫賢人出世難得平奉或託癡聾或清或濁或廉或貞或隱或見或是或非或棄薄天人或偏有所愛

入境之始惡當有異若是聖人其行不移雖諸變化久故恒情與凡有別是為不雜常俗既見之後恐不可得奉其常潛隱或去於境邑或絕蹤无迹若與是乖萬劫永隔爾與賢人結緣則坐享福祚七祖登天死升天堂衣食自然如此皆先世有緣道使之然无緣之子雖居善賢人之籬坐賢人連席其緣不會非可強求明知罪福毫分不失縱復遇會或嬰罹眾禍因是不集此皆前世无緣天迷其心鬼閉其意不使得與善會故有殊隔使其更致重難去善日遠若人之欲善因會遇害因心不退福必來會言畢於是也傳與賢人勿令漏泄具如經法盟乃傳焉

洞玄靈寶玄一真人說生死輪轉因緣經

太上洞玄靈寶中和經

母七

道言道以中和為德以不和相剋是以天地合和萬物萌芽華果熟成國家合和天下太平萬物安寧室家合和父慈子孝天垂福慶賢者深思念之豈可不和天地不和陰陽失度冬雷夏霜水旱不調萬物乖性華英焦枯國家不和君臣相詐強弱相凌夷狄侵境兵刃交錯天下擾攘民不安居室家不和父不慈愛子无孝心大小忿爭更相怨望積怨含毒鬼神錯亂家致敗傷此三者之殃由不和故也天地不和陰陽錯謬災及萬民室家不和忿怒相加以致禍殃諸賢者所以反覆相解恐人非法驕行過惡不能變悔或快怨望其過益深故重丁寧皆當用心轉相勸進除往日之惡修當今之善德行合道體定神安喜怒不介於心惡言不發於口醜聽不聞於耳色利不視於目貪欲不專於意修行正身真炁來附邪炁皆去過惡悉除善福自至奉道不可不勤事師不可不恭事親不可不孝事君不可不忠己身不可不實教戒不可不

從同志不可不親外行不可不改虛實不可不明言語不可不慎禍不可不防明者不可不問愚者不可不教仁義不可不行施惠不可不作孤弱不可不恤貧賤不可不濟厄者不可不度惡事不可不避色欲不可不絕財利不可不遠惡人不可不化賢者深思念之人行不能與法戒相應欲求天祐難矣修善得福為惡罪至罪至不能自責先日之過惡乃呼今身奉道之无益怨望皇天猶豫前却移心他念群輩相習惑萬端結黨相隨導趣邪偽陷入姦非愚人无知為行如此去道遠矣道之私大方圓无外天網羅人人處其中如大網捕魚魚行網中豈知表有網也牽網便得放網乃脫人不知真道之大如魚不知網也愚人或欲捨真遂偽事卒有効則不能久叛道者即不受罰大道含弘愛惜人命聽恣其意隨其所欲快心後當自悔此上道深遠非愚俗所能明也大道之視人如母之於子大道好生惡殺終不殺人惡人為惡而不止者自有司過記其惡事過積罪滿司殺

者伐之道終不殺人諸賢者欲除害還正當勤奉教戒不可違也道以无為為上人之過積但坐有為大道无為故能長存天地法道无為與道相混真人法道无為故致神仙道之无為无所不為人能修行執守教戒善積行者功德自立身與天通福流子孫賢者所樂惡不欲聞學者當勉力勤行也道言九受教戒奉而行之上得神仙中得倍壽下得延年而不橫天違吾師教者不盡其壽而橫天天年痛哉賢者何不修善以反長生乎雖不及中德當修下德治身世間斷絕愛欲反俗所行則與道合一不得淫泆不止志意邪念勞神損精魂魄不守正去邪前疾病害人二不得縱情喜怒積怨發憤揚聲罵詈誓盟呪詛呼天喚地驚動鬼神故犯不止積怨在內傷損五藏以此自傷病不可治有奉道者身中有天官吏兵若人數犯吏兵上白天曹言人過失過積罪成左契除生右契著死過少者罰身罪多者殃逮子孫三不得妄合毒害嫉妬於人常懷惡心心為五藏之

主而專憂喜事此一神不安諸神皆怒怒則相尅最不可犯犯之不止其殃害已四不得穢身長濁飲酒迷亂變易常性性情无防不知官禁為惡不知君父為尊罵詈无端反逆不順故天降其殃身受禍患五不得貪求財貨財貨糞土隨時而用下古世薄但貪財寶專念求利得所欲者心懷歡喜不得所欲怨恨恚心忿爭一起兵刃相賊貪欲愛財者害身之讎身沒名滅何用財為聞戒順從者翕然稱意言不可犯背戒向利者忽然復動有履冰之險蹈空之危大命傾矣險敗而欲悔罪定而稱善過以滿積天道不救財寶色欲陷身之灾賢者遠之愚者樂之賢者坐起寐卧舉動行止深用自成身无變動其福報矣道言觀諸道民精心專者萬无一人何以言之下古俗薄時俗使然競相高下上貪榮祿富貴榮飾仁義不行權詐為智父子相欺君臣相給轉相囑託貨財買官黜退忠貞任用佞邪群奸結黨阿偽所親富貴相追貧賤併棄車馬服飾浮華昌熾君子小人皆共同然

欣欣世間豈念道乎此輩愚人不足願也所以言者愚人淺薄身過榮顯驕奢盈溢施行過度恣心快意不顧法度道之清虛不受此輩神明遠之邪鬼侵之或有偽僞背真禱鬼求請天網恢恢其罰未行耳譬如炊熟下火已滅甑中餘^七未盡之間安得久也惡人雖未過罪孽如餘^七耳諸賢者人之所願以生年為善人之所惡以死終為賤豈不然乎天地平政以生賞善以死罰惡此吉凶禍福從窈冥中來禍患殃害非富貴求請而可得避非貧賤守窮而致受之修善福應為惡禍來國君雖有無極之寶至於危險傾城量金求生乞命豈可得乎而愚人見富貴者咸欲願之志欲存之勞心苦意得之不弘若欲求願修念道法室家大小同心一意掃除燒香清靜儼然具自關啓說其所欲道人虛道何所不應若有求願不用金銀玉帛財寶貨賄不用人事求請不用酒肉祭禱但歸心於道為而得之隨意賤之賤物立信而已亦不用多而欲習效俗人背法求請事事反失欲得福

願要當勤心精進晨夕清淨燒香起念福無不應好樂者福德無量不樂者自隨本心至道寬弘慈隨人耳賢者念道精進常恐不及愚者輕忽大道亦恐不遠矣此賢愚不同學者勉力勤行也

道言諸奉道之家或遇災厄疾病死亡縣官口舌以致不利者皆由奉法不勤雖知道尊而欲奉之其所施行與俗不別欲以邪偽干亂正真終不可也諸如此輩雖係名奉道望道擁護道不救也惡人蠢愚殊能起心改悔歸誠於道者稀耳方更背戾謂道不神雖不口言心內怨望殞往之日悔復何及愚人痛哉賢者正心守念不敢懈惰當自戒約在事勤修大道至尊高而無上周圍无外包含天地制御衆神有生萬物蛸飛蠢動含炁之類由道所生道之威神何所不集何所不感何所不消何所不服把持天機驅策萬神道先天地而生家廓无窮人處其間年命倏忽猶如石火大道含弘乃惜人命人命危脆故令勤修行善而人不能存思於道精勤修善違

背正真不從教戒但貪富貴榮祿色利財寶飲酒食肉恣心快意驕奢盈溢復念道人不念道道不念人人之如魚得水而生失水而道道之去人何望久生乎要在精進存念至道諸賢者欲得保全性命皆除去先日所犯過惡進修後善見人有失轉相勸誡相教作善報其功効受福无量道无形相不見云為欲得恩福當在修行晨夕清靜若見人疾病當相救助急緩相恤不得以智欺愚乘威縱暴假託神鬼恐嚇愚人或有小知稱名自大輕忽於人更相疑謗背向調論諸賢者不得敬貴輕賤愛憎二心不得隨情請福以為惠施毀敗正法身及受殃當同志相求同明相照同法相教若男女不曉書疏者專心好道可就明者聽誦經戒會靜舍中亦可堂上灑掃清潔整飾容儀體安神靜精思明聽勿妄譁言逸語用行傾邪遊心他念不存經戒恍惚睡寐勞神苦思體自勞疲徒苦无益若能如戒精進不倦必當受福天官吏兵自來護之攘却衆殃萬物之中以人為貴人處天

地之間皆知生來之月不知死去之日賢者惡人富貴賤各自謂壽命終年誰欲先取其窮窮者人所不樂然愚人積罪作惡病成至死而不能自知修道行善者福德人生壽命制之在天天雖不言常福善人故聖人隨世世清則顯世昏則隱不可常存故遺教戒教戒者勸人行善全身保命人能奉法不倦何但卒壽方得延年受无窮之福此非富貴者貨財求請所能得非酒肉祭禱鬼神所致也道士賢者敬奉教戒專精勤念先苦後甘真應感會賢與不肖富貴貧賤亦皆有願唯道士執志故能以教戒自檢行止舉動愛欲之間守戒不違心无傾邪若見色利以戒掩目若聞好惡之言以戒塞耳若食甘香之美以戒杜口若想財寶愛欲以戒挫心若有奸非趣向惡事以戒斷足守之不廢可謂明矣當勤勸愚者使能承用所以道士心善施惠天道有應受福无量道出自然先天地而生名曰无上玄老太上三炁混沌為无上正真之道道之私大包含天地變化神炁布散

八極之外內潛毫毛之中生育萬物制御諸天統攝百億大无不覆小无不入清虛无為故能長存含濁茹穢故為萬物之母道之无親唯與善人善人者以致神仙此非富貴者求而得之非貧賤者鄙而不達能專好樂精誠思念修身行善則合道矣而世人愚淺浮偽遊身於群俗之間貪須臾之樂飲酒食肉以快情志不能苦身行道供養燒香恭敬正道當修功立訓謙讓仁義行柔弱行善念清靜修身无為初雖勤苦終以受福不與俗人輩同而人但貪須臾之利命過之後書名黑簿鬼錄之中道士俗人相去遠矣何以言之道士清正生名上屬天官俗人穢濁无屬地官豈不遠乎惡人守俗不奉道法可謂大迷矣人之生身各有眼耳鼻口心意膈愚之行各異愚者目專視色耳聽好惡鼻聞甘香之炁口食五味之美心好縱恣之欲隨意導身趣向奸非賢者不然目不視所好之色耳不聽邪惡之言鼻不通臭惡之炁口不樂滋味之美心不想所欲之快足不趣向惡事之非

道士所行亦知所欲為快以戒制情故不犯惡善積行著與道相應受福无窮惡人所行知惡近禍而不能專誠與道相反望欲得福若欲得福何不效道士奉道清正守真无為唯當勤身苦行精進謹修亦无貧賤見違亦无強豪相奪亦无富貴爭進亦无作使之苦何不在事修善精專奉道勤身守道專行諸念千善當著萬善當備唯九百九十九善一善未滿終為利動皆棄前功治世間念守戒不變度在神仙古有陽公十五奉道六十未報修身不倦年至八十福報无量乃與天通福流子孫道士賢者可不勤焉

太上洞玄靈寶中和經